



MODALEN KOMMUNE

RUSMIDDELPOLITISK

HANDLINGSPLAN

2013 – 2017

INNHALD	Side
1. Innleiing – lovverk	3
2. Skildring av rusmiddelsituasjonen i Modalen kommune	3
3. Statlege mål	4
4. Modalen kommune sine mål og strategiar	5
5. Tiltaksplan	6
6. Tiltak for å regulere tilgjenge av alkohol	8

Handsaming i Kommunestyret 31.10.2013

Assisterande rådmann orienterte om saka i møtet.

Spørsmålet om å setje ei absolutt aldersgrense på 18 år for deltaking på arrangement der det vert servert alkohol vart drøfta. (Pkt. 5.2 førebyggjande tiltak og 6.2.2 Retningslinjer for skjenkeløyve underpunkt 2.2. Einskildløyve.). Dette vart drøfta i lys av gjeldande skjønn ved tildeling av skjenkeløyve for ulike arrangement.

Harald Farestveit gjorde framlegg om at praksis vart stramma inn og at det vart sett ei absolutt grense: 18 år.

Røysting:

Framlegget frå Harald Farestveit fall mot ei røyst.

Det vart deretter røysta over framlegg til vedtak frå rådmannen.

Samrøystes.

VEDTAK: KS-024/13

Rusmiddelpolitisk handlingsplan for Modalen kommune 2013 - 2017 vert vedteken slik den ligg føre.

1. Innleiing - lovverk

Formannskapet vedtok i sak 062/12 fylgjande:

Rådmannen får fullmakt til å etablere ei tverrfagleg arbeidsgruppe for utarbeiding av rusmiddelpolitisk handlingsplan for Modalen kommune. Representantar frå oppvekst, helse og kultur må vera representert inn i gruppa.

Arbeidsgruppa skal gå gjennom kommunen sine rusførebyggjande tiltak og tiltak for rusmiddelavhengige. Det må gjerast ei vurdering av korleis ein bør utvikle tiltaka, samt fremje forslag til nye tiltak for å møte utfordringar og endringar. Sals og skjenkepraksis i kommunen skal inngå i vurderingane.

Formannskapet er styringsgruppe for arbeidet.

Arbeidsgruppa starta opp arbeidet med prosjektplan 12.02.13. Gruppa har hatt denne samansetninga: Jahn Olav Nordheim, Frøydis Gullbrå, Inga Jorunn Nåmdal, Oddvin Neset, Jorunn H. Brekkhus. Politiske representantar i gruppa valde av Formannskapet: Tone S. Skuggevik og Harald Farestveit.

Arbeidsgruppa har nytta *Veileder for kommunal rusmiddelpolitisk handlingsplan (Sosial og helsedirektoratet)* som mal og rettleiing til utarbeiding av plandokumentet. KoRus Vest - Bergensklinikkane har bistått med rettleiing undervegs i planarbeidet.

Alkoholpolitisk handlingsplan for Modalen kommune vart vedteken i Kommunestyret 8. november 2000 i sak 043/00. Både lovverk og samfunnsutviklinga gjer at planen er moden for revisjon.

Ein rusmiddelpolitisk handlingsplan er meint å vere eit tverrfagleg og tverretatleg arbeidsreiskap for å kontrollere og redusere rusksadar i lokalsamfunnet. Dette gjer at vi må sjå dei rusmiddelpolitiske utfordringane i samanheng, prioritere førebyggjande tiltak og hjelpetiltak ut frå Modalen kommune sin situasjon og behov. Alle typar førebyggjande tiltak, løyvepolitikk, oppfølging og rehabilitering av rusmiddelmissbrukarar bør inn i ein samla plan. Kommunen sine ruspolitiske strategiar er ein viktig del av folkehelsearbeidet. Mål, strategiar og tiltak på rusmiddelområdet vedkjem helsetenesta, sosialtenesta, skule, kultur- og organisasjonsarbeid. For å løyse utfordringar knytt til rusmiddel, er det heilt nødvendig å samarbeide innan kommunen, mellom kommunar og på sentralt nivå. Planen inneheld og føreskrift med reglar for opningstider, skjenketider og salstider for Modalen kommune.

2. Skildring av rusmiddelsituasjonen i Modalen kommune:

Det er ikkje gjort systematiske undersøkingar som dokumenterer rusmiddelbruk som problem i kommunen. Uansett kor liten eller stor ein kommune er, vil det alltid vera nokon som i ein eller annan grad har utfordringar knytt til eige eller nærståande personar sitt rusmiddelbruk. Slik er det og i Modalen kommune.

I samband med planarbeidet har me gjort ei enkel kartlegging av rusmiddelsituasjonen i kommunen. Me har førespurt tilsette innan helse, sosial, politi og barnevern. På grunn av små tal, er kartlegginga unnateke ålmenta. Oversikta syner likevel at det også i Modalen bur menneske med byrjande, moderate eller alvorlege problem knytt til alkohol og medikamentbruk. Ut frå kartlegginga, ser det ikkje ut til at bruk av narkotika eller anabole steroidar er representert. Ein kan likevel ikkje utelukke at dette førekjem.

Tal syner at alkoholomsetninga i Modalen har vore svakt aukande dei siste tre åra. Det er usikkert om dette kan ha samanheng med turisme, eller om det er omsetninga til lokalbefolkninga som aukar. Talet på innbyggjarar som treng hjelp frå kommunen si sosialteneste som følgje av rusmisbruk, er lågt og har ikkje endra seg dei siste ti åra. Lensmannen i Nordhordland melder at det er svært lite problem knytt til rus og skjenking i kommunen generelt sett. Unnataket her er enkeltarrangement i samband med Modalsdagane, der Lensmannen rapporterer at det då vert registrert mykje rus.

3. Statlege mål:

Dei siste 15 åra har landet vårt gjennomført viktige reformer og tiltak med verknad for rusmiddelpolitikken. Alkoholova, opptrappingsplan for psykisk helse, rusreforma, handlingsplan mot fattigdom, NAV-reforma og samhandlingsreforma er nokre eksempel. Om ein skal lukkast med å redusere rusproblema i samfunnet, må fleire sektorar vera med. Stortingsmelding nr. 30 "Se meg", set fokus på alkohol, narkotika, vanedannande legemiddel og doping som samfunnsproblem, og ser ruspolitikken i eit større perspektiv enn berre å fokusera på dei som rusar seg.

Nasjonal helse- og omsorgsplan 2011-2015 gjev overordna føringar for folkehelsearbeidet og helse- og omsorgs tenestene. Målet på folkehelseområdet er fleire leveår med god helse i befolkninga og redusert helseulikskap mellom sosiale lag, etniske grupper og kjønn. Samhandlingsreforma er ei reform for auka satsing på helsefremjande og førebyggjande arbeid.

Regjeringa legg vekt på ein heilskapleg rusmiddelpolitikk. Frå førebygging, tidleg innsats og hjelp til dei som har omfattande rusproblem, til ein politikk som også tek i vare pårørande og tredjepart som vet råka av skader av rusmiddelbruk. Gjennom ein eigen strategi for auka kompetanse og betre kvalitet, vil regjeringa styrke kunnskap om rusproblematikk. Barn, unge, pårørande og menneske med særleg omfattande hjelpebehov må få auka merksemd. Tilbodet til dei som er tyngst råka, skal og styrkast.

I rundskriv IS1-2013 ber Helsedirektoratet mellom anna om at kommunane:

- Opprettheld, vidareutviklar og styrkar kapasitet og kompetanse innan rusarbeid og psykisk helsearbeid.

- Ser innsatsen på fagfelte psykisk helsearbeid og rusarbeid i eit brukarperspektiv og i samanheng med folkehelsearbeid.
- Styrkar tilbodet til barn og unge med samansette problem gjennom godt koordinerte tenester bygd på internt tverrfagleg samarbeid, samarbeid med fylkeskommunen om å førebyggje «drop out» frå vidaregåande skule og etablering av samarbeidsrutinar med spesialisthelsetenesta. Vektlegging av lågterskeltilbod og oppsøkjande tenester.
- Styrkar tilbodet til eldre med psykiske problem og/eller rusrelaterte problem.

Helse- og omsorgslova seier at: "Helsefremmende og forebyggende arbeid skal bl. a. omfatte systematiske tiltak for å identifisere personer som står i fare for å utvikle psykisk eller somatisk sykdom, lidelse eller helseproblem, sosiale problemer eller et rusmiddelproblem og iverksette forebyggende tiltak og tidlig intervensjon i henhold til anerkjent faglig standard." Skadar og problem påført andre enn den som drikk, "passiv drikking", er omfattande og får lite merksemd. Auka kunnskap om skadeverknader må vera ein viktig del av det førebyggjande arbeidet. Samhandlingsreforma er retningsgjevande for innsatsen mot rusproblem og regjeringa legg særleg vekt på fem område:

- Førebygging og tidleg innsats
- Samhandling – tenester som arbeidar saman
- Auka kompetanse og betre kvalitet
- Hjelp til tungt avhengige – redusere overdosedødsfall
- Innsats for pårørande og mot passiv drikking.

4. Modalen kommune sine mål og strategiar:

4.1 Overordna mål for rusmiddelpolitikken:

Alkohol ser ut til å vere inngangsporten til bruk av andre rusmiddel. Kommunen vil difor prioritere helsefremjande og førebyggjande innsats i høve til ungdom og alkohol.

Hovudfokus må vera å styrkje dei faktorane som skjermar barn og unge mot skadar og belastningar knytt til eige eller andre sin bruk av rusmiddel.

Kommunen er grunnpilaren i velferdstilbodet og har eit omfattande ansvar for menneske med rusrelaterte problem. Ansvarer følgjer av lovverket.

Kommunen skal stille til rådvelde både akutt behandling og oppfølging. Godt samarbeid med spesialisttenesta og kompetansehevande tiltak må ha prioritet. Ein må ha kunnskap for å kunne sjå, avdekke og reagere. Av di kommunen er så liten, vil fagetatane ofte mangle mengdetrening.

Kommuneplanen har som visjon at Modalen kommune skal vera den beste kommunen å bu i. Modalen kommune skal vera ein stad der både unge og eldre trivst. Innbyggjarane skal ha tilgang på fritid og kulturtilbod uavhengig av funksjonsnivå. Tilboda skal vera stimulerande fysisk, mentalt og sosialt.

Folkehelsearbeid er alt arbeid som fremjar helse og trivsel, og som førebyggjer sjukdom, skade og liding. Den største sjukdomsbelastninga den vestlege verda i dag er sjukdommar knytt opp til levevanar. Det er ålment kjent at hyppig bruk av rusmidlar gjev auka helserisiko. Mykje av grunnlaget for god helse gjennom heile livet vert lagt i barne og ungdomsåra. Dette perspektivet er viktig å ha for auga i planarbeidet i kommunen.

4.2 Utfordringar:

- Ikkje alle i befolkninga nyttar fritidstilboda i kommunen.
- Ungdomane må flytte tidleg på hybel.
- Sosial lærdom ved skjenking på arrangement, sosiale treff som er opne for barn og unge.
- Liten kommune, vanskeleg å kunne ha spisskompetanse på alle felt.

5. Tiltaksplan

5.1 Allmennførebyggjande tiltak:

Modalen kommune har mange tiltak og aktivitetar som er positive for folkehelsa og som verkar rusførebyggjande. Det at menneske ser kvarandre, møtest og tek seg tid til å prate er i seg sjølv både rusførebyggjande og generelt helsefremjande. Modalen kommune har eit aktivt idrettstilbod, tilrettelagde løyper for naturopplevingar og lett tilgang til sosiale møteplassar. Det finns mange aktive lag og organisasjonar i kommunen, og det er etablert gode tilskotsordningar til desse.

Tiltak: Me vil styrke og oppretthalde dei tilbod og aktivitetar me har i dag og som verkar positivt på folkehelsa.

5.2 Førebyggjande tiltak:

Det tverrfaglege arbeidet i kommunen er viktig med tanke på førebygging overfor risikoutsette grupper.

Modalen kommune legg i dag til rette for fylgjande førebyggjande tiltak:

- Eit aktivt lagsliv med tilbod til alle aldersgrupper, gjennom økonomisk stønad.
- Tilsett ungdomsarbeidar som driv Ungdomsklubb/Juniorklubb
- Tilbod til befolkninga om subsidierte årskort for bruk av Bryggjeslottet.
- Merka og rydda turløyper i heile kommunen
- Barnehage og skule der næringsrik og sunn kost er ein del av det daglege tilbodet
- Barnehage og skule der friluftsliv er i fokus.
- Eit rikt kulturliv med konsertar, temadagar og aktivitetstilbod både for innbyggjarar og tilreisande
- Lågterskeltilbod: Helsesøster og psykisk helse er aktivt deltakande i skulemiljøet .
- Interkommunalt samarbeid med Ungdomskontakten Salto i Knarvik.
- Låg terskel for tildeling av støtte/aktivitets/treningskontakt.
- Dagtilbod for eldre for å stimulere til aktivitet og førebyggje isolasjon.
- Kommunal fysioterapeut i samarbeid med Pensjonistlaget gjev treningstilbod i Bryggjeslottet.
- Tilbod om sommarjobb for ungdom i alderen 16 t.o.m 23 år(ungjobb).
- Rusfritt arrangement 16. mai i Bryggjeslottet. Fotballkamp på storskjerm.

Tiltak:

- Arrangere rusfri konsert for ungdom i samband med Modalsdagane.
- Sikre rusfrie møteplassar:
 - ved alle arrangement som er retta mot barn og unge.
 - ved alle arrangement som er retta mot familiar.
 - ved alle idrettsarrangement.
 - Arrangement der det kan skjenkast alkohol skal vera retta mot eit vakse publikum. Slike arrangement skal sikrast tilstrekkeleg vakthald ut frå forventa tal besøkjande og risiko.

5.3 Kompetanse:

Modalen kommune ser det som viktig å ha og vedlikehalde kompetanse om rus i organisasjonen.

Tiltak:

- Sikre at personale i barnehage, skule og helse- og sosialtenesta har nødvendig kompetanse for å kunne sjå, avdekke og reagere.
- Byggje faglege nettverk. Små einingar, einsame postar gjer nettverksbygging særleg viktig.
- Utvikle tverrfaglege arenaer, Distriktpsykiatrisk senter (DPS), Frisklivsentralen

5.4 Samhandling:

Helse og omsorgslova pålegg kommunane eit samla ansvar for å yte tenester til befolkninga. For å kunne få til dette, må me ha:

- Fokus på tett samhandling innan kommunen (Nav, skule, helse, pedagogisk-psykologisk teneste og kultur).
- Samhandling med spesialisttenesta (barne- og ungdomspsykiatrisk poliklinikk, vaksenpsykiatrisk poliklinikk).
- Samarbeid med lensmann/politi (førebyggjande strategiarbeid/haldningsskapande, kurs, temakveldar)
- Samarbeid med Oppfølgingstenesta i vidaregåande skule.
- Samarbeid med Bergensklinikkane, KoRus-Vest Bergen, som er kommunane sitt kompetansesenter.

Ved å ha etablert eit klima for tett samhandling, har ein opparbeidd låg terskel for kontakt når det oppstår behov.

5.5 Behandling rehabilitering og ettervern:

Når rusmisbrukaren ynskjer hjelp må tiltaka tilpassast individuelt med sikte på å hindre forverring og lindre/avslutte kronisk tilstand ved å:

- Hjelp den einskilde til å kome bort frå misbruket sitt
- Gje råd, rettleiing og hjelp til misbrukaren og den næraste familien hans/hennar
- Syte for behandlingssopplegg i nærmiljø eller institusjon
- Utarbeide tiltaksplanar.

Tiltak:

- Tilby rusmisbrukarar heilskapleg oppfølging og rehabilitering.
- Tilby pårørande heilskapleg støtte og rettleiing.
- Innføre ansvarsgrupper og Individuell Plan (IP) i arbeidet. Formalisere samarbeidet med spesialisthelsetenesta ved avdeling for rusmedisin i Helse Bergen.

6.0 : Tiltak for å regulere tilgjenge av alkohol:

6.1 Aktuell situasjon, sal og skjenking

Løyver til sal og skjenking i Modalen kommune i dag:

Coop Modalen, avd. Mo : Salsløyve for øl, vin og brennevin inntil 4,75 volumprosent (perioden fram til 30.06.2016).

Coop Modalen, avd. Øvre Helland: Salsløyve for øl, vin og brennevin inntil 4,75 volumprosent (perioden fram til 30.06.2016).

Mobryggja A/S: Skjenkeløyve for øl, vin og brennevin (perioden fram til 30.06.2016)

Bryggjeslottet har løyve til å skjenke til slutta lag. Skjenkeløyve for øl og vin (perioden fram til 30.06.2016)

6.2 Retningslinjer for sals og skjenkeløyvepolitikken

"TAK" PÅ SALS- OG SKJENKELØYVE

Alkoholova §1-7 gjev kvar einskild kommune høve til å setje ei grense for kor mange sals- og skjenkeløyve ein ynskjer å ha i kommunen. Modalen kommune har ikkje hatt slik grense. I tillegg til løyva som er skissert over har ein ambulerande løyve som kan gjevast til slutta lag. Det låge folketalet gjer at etterspurnaden frå verksemdar som søker sals- og skjenkeløyve vil vera avgrensa. Auka satsing på turisme gjer at talet på skjenkeløyve kan variera frå år til år og frå årstid til årstid. Det vil vera større behov for skjenkeløyve sommarhalvåret enn vinterhalvåret.

Det vert i planen ikkje sett tak på antal løyve, for tildeling av løyve vert det i staden stilt klare krav til driftsopplegg.

Det vert ført aktiv kontroll med at løyva vert forvalta i tråd med lover og reglar og dei vilkår som er stilt når løyvet vert innvilga.

6.2.1 Retningslinjer for salsløyve

Løyve til sal av øl, vin og brennevin, som inneheld mellom 2,50 og 4,75 volumprosent alkohol kan verta gjeve på grunnlag av desse retningslinene til daglegvareforretningar når verksemda stettar dei krava som vert stilt til lov og forskrifter.

1. Sal av øl, vin og brennevin som inneheld mellom 2,50 og 4,75 volumprosent alkohol, kan berre gå føre seg innanfor følgjande tidsrom:

Måndag – fredag: kl.08.00 – 20.00

Laurdag og dagar før helgedagar: kl.08.00 – 18.00. (Gjeld ikkje dagen før Kristi Himmelfartsdag.)

Sal på påske-, pinse, jol- og nyttårsafta skal vera som for laurdagar. Sal er elles forbode på søndagar og helgedagar, 1. og 17. mai og på røystedagar for kommune- og stortingsval.

2. Salet skal gå føre seg i samsvar med gjeldande lov og forskrifter. Det vert ført aktiv kontroll med at løyva vert forvalta i tråd med lover og reglar og dei vilkår som er stilt når løyvet vert innvilga.
3. Det skal svarast ei årleg avgift for salet, med heimel i forskrift og berekna utifrå omsetnad.

6.2.2 Retningslinjer for skjenkeløyve

Løyve til skjenking av øl, vin og brennevin kan verta gjeve på grunnlag av desse retningslinjene, til verksemder som stettar dei krava som vert stilt i lov og forskrifter. Kvar skjenkestad skal ha sitt eige løyve. Jf. merknader til Alkoholova, punkt 1.4b.3.1.

1. Tal på løyve: Tal av løyve er ikkje avgrensa, for tildeling av løyve vert det i staden stilt klare krav til driftsopplegg.

Det vert ført aktiv kontroll med at løyva vert forvalta i tråd med lover og reglar og dei vilkår som er stilt når løyvet vert innvilga.

2. Generelt skjenkeløyve

2.1 Alminneleg løyve for skjenking av brennevin, vin og øl kan gjevast til:

- Serveringsverksemder som er retta mot eit vakse publikum der kommunen meiner staden sin karakter tilseier at skjenking er forsvarleg. Jf. Alkoholova § 1-7
- Skjenkearealet skal gå klart fram av søknaden, også ved evt. søknad om uteservering. Arealet skal vera fysisk avgrensa.

2.2 Einskildløyve

Løyve til skjenking av øl, vin og brennevin ved einskildarrangement kan gjevast til:

- Tilskipar av einskildarrangement der skjenking er ein underordna del av eit driftsopplegg. Anna aktivitet, som kultur-, reiselivstilskipingar m.v., retta mot publikum over 18 år.

- Ved tildeling av einskildløyve skal søkjar sin kunnskap om alkohollovera vektleggjast. For å få ei mest mogeleg profesjonell utøving av skjenkinga er det ynskjeleg at etablerte skjenkestader står for skjenkinga.
- Det vert lagt vekt på at skjenkinga ikkje må føre med seg problem med ro og orden, eller trafikale vanskar. Uttale frå lensmannen som skal verta innhenta før søknad vert avgjort, jf §1-7.
- Skjenking må finna stad i eit eigna lokale eller avgrensa område, som skal vera klårt gjort greie for i søknaden. Arealet skal vera fysisk avgrensa.

2.3 Ambulerande løyve

Løyve til servering av brennevin, vin og øl ved slutta lag, jf. §§ 4-2 og 4-5.

Kan gjevast til:

- Arrangør av slutta lag som finn stad i selskapslokale.
Mrk. lovgjevar si tolking av omgrepet "slutta lag" i merknadene til § 4-5, og unntak frå løyveplikta i § 8-9 for privatpersonar.

3. Det vert ikkje gjeve skjenkeløyve til:

- Arrangement der målgruppa er barn, ungdom og familiar
- Arrangement som er særskilt innretta mot motortrafikantar eller idrett.

4. Skjenketider

Gjeld alle løyve:

- Konsum av utskjenka alkoholhaldig drikk må opphøre seinast 30 minutt etter at skjenketida er slutt.
jf. alkohollovera § 4-4.

I Retningslinene står vekedag for den dag skjenkinga startar, sjølv om skjenkinga held fram til over midnatt, slik at når det er oppgjeve skjenketid fredag kl. 08.00 – 02.00, er dette frå kl. 08.00 fredag og til kl. 02.00 natt mellom fredag og laurdag.

4.1 Brennevin: Alle vekedagar: kl. 13.00 – 24.00

4.2 Vin og øl: Alle vekedagar: kl. 08.00 – 02.00

4.3 Brennevin, vin og øl til slutta lag etter ambulerande løyve eller einskildløyve:

Alle dagar:

Brennevin kl. 13.00 – 24.00

Vin og øl kl. 08.00 – 02.00

4.4 Utvida skjenketider

Ved særskilde arrangement kan det på visse vilkår verta gjeve løyve til utvida skjenketider innanfor lova si maksimalgrense:

- Det skal verta utøvd ei restriktiv haldning til søknader om utvida skjenketider.
- Det skal verta stilt krav om at arrangementet har vesentleg verdi for tilskipingar, publikum og lokal/regionale omsyn. Det skal òg verta lagt stor vekt på omsyn til ro og orden for ålmenta.

5. Gebyrinntekter:

Dei årlege gebyra som vert innkravde etter Alkohollova skal uavkorta gå til:

- Kommunen si utøving av kontroll med sals- og skjenkestadene
- Behandlingstiltak for personar med rusproblem
- Førebyggjande tiltak

6. Kontroll

Kontroll med sal og skjenking Jf. A-lova § 1-9: Kommunen sitt kontrollutval etter Alkohollova er identisk med medlemmene i Formannskapet.

Sals- og skjenkekontroll:

Forskrift til alkohollova skisserer at kvar sals og skjenkestad skal kontrollerast minst ein gang i året, men til saman pliktar kommunen å gjennomføre minst tre gonger så mange kontrollar pr. år som ein har sals og skjenkestader.

- Rådmannen skal sjå til at det er engasjert kontrollør som fører tilsyn med kvar sals- og skjenkestad i tråd med lov og forskrift.

6.3 Sakshandsaming

Ved søknad om sals- og skjenkeløyve skal det innhentast uttale frå politi og skatte- og avgiftsstyresmakter for å sikra at verksemdar, eigarar og styrarar stettar krava som er stilt i lov og forskrift. Søknader om skjenkeløyve må gjera greie for skjenkestadens driftsopplegg, areal, tilkomst m.v.

Unntak: Ved søknad om einskildløyve er det tilstrekkeleg å innhente uttale frå sosialtenesta og politiet.

Ved søknad om ambulerande løyve er det tilstrekkeleg med uttale frå sosialtenesta.

6.4 Reaksjonar ved brot på alkohollova med forskrifter.

Reaksjonar ved brot på alkohollova med forskrifter vert å vurdere skjønsmessig i kvart einskild tilfelle på grunnlag av gjeldande lover og reglar, etter fyljande retningslinjer:

1. Ved brot på alkohollova med forskrifter eller på kommunale vedtak med heimel i lova, vert det til vanleg reagert med ei skriftleg åtvaring ved fyrste brot.
2. Ved grove brot kan det verta reagert med inndraging av løyve i minimum 7 dagar alt ved fyrste gongs brot.
3. Som grove brot på reglane om sal/skjenking vert rekna:
 - a) Sal/skjenking til personar som er under aldersgrensa, jf. A-lova § 1-5
 - b) Sal/skjenking til personar som er openbart rusa, jf. A-lova § 8-11
 - c) Sal/skjenking utover fastsett skjenketid, jf. A-lova § 4-4.
4. Ved 2. gongs brot, kan løyve verta inndrege for eit tidsrom på 2 veker – 3 månader.
5. Ved ytterlegare brot kan løyvet verta inndrege for heile løyveperioden.
6. Inndraging skal skje straks vedtaket er gyldig, det vil seia at klagefristen er ute og vedtaket er endeleg. Om ikkje anna er fastsett i vedtaket om inndraging skal inndragingsperioden starta frå tilsvarande vekedag som brotet fant stad. Vurdering av tidspunkt og lengde for inndraginga kan ta omsyn til at reaksjonen ikkje får ein uforholdsmessig verknad sett utifrå det brotet vedtaket gjeld.
7. Inndraging av løyve for eit bestemt tidsrom på døgeret, t.d. etter kl. 22.00 for ein lengre periode, kan vere eit alternativ til heil inndraging av løyvet.
8. Kontrollutvalet fattar vedtak om reaksjon på brot. Rådmannen får delegert fullmakt til å gje åtvaringar i samsvar med pkt. 1. Desse skal gjevast melding om til kontrollutvalet.
9. Er ikkje omsetnadsoppgåvene leverte innan fastsett frist, kan rådmannen inndra løyve fram til oppgåva er levert.
10. Er ikkje avgift for sal eller skjenking betalt innan fastsett frist, kan rådmannen inndra løyve fram til avgifta er betalt.
11. Brot på andre lover og reglar enn alkohollova kan òg føra til inndraging av sals- eller skjenkeløyve, jf. A-lova § 1-8.
12. Foreldingsfristen for brot vert etter desse retningslinene sett til 2 år.

6.5 Delegasjon av fullmakt etter alkohollova, jf. § 1-12. Delegasjon.

Modalen kommune sitt delegeringsreglement, jfr. vedtak KS 049/12.

6.6 Informasjon og samarbeid

Kommunen skal samarbeida med verksemdene som har løyve til sal og skjenking, og aktivt formidla informasjon til verksemdene, styrarar og stedfortredarar. Dette skal verta gjort direkte frå kommunen, og gjennom skjenkekontrollen. Kommunen skal tilby obligatorisk kunnskapsprøve i alkohollova.

6.7 Høyring:

Planutkast har lagt ute på kommunen si heimeside og på Kundetorget for offentliggjennomnsyn i 4 veker frå 26.juli til 26.august 2013.

Referanseliste:

- 1) Lov om omsetning av alkoholhaldig drikk (av 2. juni 1989)
- 2) Lov om barneverntenester (av 17. juli 1992)
- 3) Lov om helse- og omsorgstjenester (av 24. juni 2011)
- 4) Lov om folkehelse (av 24. juni 2011)
- 5) Lov om vern mot smittsomme sykdommer (av 5. august 1994 nr 55)
- 6) Lov om psykisk helsevern (av 2. juli 1999 nr. 62)
- 7) Nasjonal helse- og omsorgsplan (2011–2015)
- 8) Veileder for rusmiddelpolitisk handlingsplan, IS-1362